

zercha dar galie a' monasterij. Andò in renga sier Marco Trun, *quondam* sier Antonio, et contradise, dicendo era stà promessa una galia a le munege di San Cosma e Damian, et horra sier Lunardo Grimani fa meter questa, et non si observa le parte *etc.*; et parlò do volte, perchè li consieri feno lezer una parte, *alias* presa, come questa; et lui sier Marco *iterum* in renga, dicendo l'è preso far uno scontro a Zuan Trivixan, di camerlengi, et *tamen* non è stà exequida. Or andò la parte: 390 di no, 580 di sì; et fu presa.

Da mar. Si ave esser roto in Cypro uno maran di sier Francesco Malipiero a le Saline, con formenti, cargadi in terra ivi, hessendo per partirsi, et si rompe'.

E da saper, in questi pregadi vene certe letere di syndici, sier Vetur Capelo, sier Andrea Mozenigo, dotor, et sier Lorenzo Orio, dotor, auditori nuovi, zercha le cosse di Faenza, contra sier Marco Zorzi, provedador, aver fato restitution *etc.*, con contento di populi et sier Marco Zorzi, provedador *etc.* Or sier Piero Balbi, cuxin dil dito provedador, andò in renga, giustificando dito sier Marco, dicendo hanno fato restituir lire 27 di bolognini *etc.*

A dì 25. Fo consejo di X, con zonta di colegio e altri.

A dì 26. Fo pregadi. Et leto le infrascripte lettere, *videlicet*:

Di Franza, di l' orator. Dil zonzer il re a Burgos a di 17, poi si partirà per Lion. *Item*, esser venuto li in Franza el cardinal del Fanal; et altri colloquij abuti col re secreti *etc.*

Da Milan. Come a l' impresa di Simon Rigon l'è andato capitano Trojan Papacoda, napolitano, con zente *etc.* *Item*, dil zonzer li a Milan il gran maistro ritornato di Franza, qual anderà a l' impresa di Genova *etc.*, *ut in litteris.*

Di Ravenna, di rectori. Dil zonzer li 40 stratioti, di quelli stati a stipendio dil papa, venuti per non esser pagati, volendo danari dal papa, et veriano a soldo di la Signoria nostra. *Item*, sier Domenego Malipiero, provedador di Romagna, zonto li con Lattantio di Bergamo con provisionati, et partito per Russi.

Dil papa si ave aviso, come a di 25 parti di Ymola per Forli; passerà vicino a Faenza; à *solum* 200 provisionati, ch'è la guarda dil papa, et Zuan Paulo Bajon, con la sua condotta, disarmati. Et per colegio fo scritto a sier Marco Zorzi, provedador di Faenza, *licet* fusse papalista, che dovesse, zonto fusse sier Domenego Malipiero in Faenza, andar contra il papa et acompagnarlo *etc.*

Da Corfù, di sier Zuan Zantani et sier Bernardo Barbarigo, rectori. Dil morbo, qual è apizato nel borgo; hanno fato provision, *adeo* si tien non seguir altro. *Item*, dil partir dil chaschi di l' orator dil soldan per Alexandria, a di . . . , con la galia, soracomito sier

Fu posto, per li savij, che per il fabbricar il ponte di la Piera di Verona debino contribuir a le opere *etc.* privilegiati e non privilegiati; e fo presa.

Da Costantinopoli, dil baylo, di 6 zener. De 258 l'ussir di X fuste, tra le qual è galie 3, capitano uno turcho, perhò che Camalli non hèn in gratia al presente de li bassà; et sono ussiti di stretto, per andar contra corsari turchi et fuste rodiane, qual dannizano turchi.

Da Brexa, di rectori, per avisi auti, et etiam una letera dil conte di Pitiano, capitano general nostro da terra. Di nove di Zenoa; et che missier Zuan Alvise dal Fiesco à promesso al re ducati 100 milia, volendo tuor l' impresa contra il populo in favor di zenthilomeni *etc.*, *ut in litteris.*

Fu posto, per li savij ai ordeni, atento le galie di Barbaria non ha trovato patron, li sia cressuto ducati 500 di più di don per galia di quelli tre officij, *ut in incantu.* Sier Alvise Soranzo, è di pregadi, contradixè, dicendo saria meglio mandar 2 galie solle con mancho don. Sier Piero Antonio Morexini, savio ai ordeni, rispose aver consultato esser meglio tre, si per dar inviamento a la marinareza, qual per la segurtà *etc.*; e fu presa la parte. Et li consieri veneno a Rialto la matina a incantar dite galie et non trovano patroni.

Fu posto, per li savij, che a sier Hironimo Baffo, electo capitano a Napoli di Romania, li sia dato, a conto di suo salario, di qui ducati 400, et ducati 100 al castellan va a Otranto, di sovenzion; et fu presa.

Fu posta certa parte, per li savij, di riconzar la parte di far gratie a' debitori di la Signoria, più larga di quello è preso. Sier Lunardo Grimani, consier, messe a l' incontro certa clausula. Parlò per la parte sier Antonio Zastignan, dotor, savio a terra ferma, et *tamen* non fu mandà la parte, rimessa *ad melius consulendum.*

Fu posto, per li savij, dar certa provision, *ut in parte*, a Pollo da Nona, fradello dil *quondam* Bernardino da Nona, morto da' turchi *etc.*; fu presa.

Fu posto, per li consieri, certa exention di la masena a le munege di Santa Anna di Padoa, *ut in ea*; fu presa.

In questo zorno nave 5 di soria feno vella, a horre 22, vanno molto riche, per valuta di duca-